

26/01/2003

Malam jual popia, pagi lukis potret

Ihsan Noorzali

SELAMA ini, pelanggan hanya melihat Fakir Jamal Mohamad, 27 menjual popia

sejak jam 6 petang hingga 12 tengah malam tanpa mengetahui anak muda itu juga berbakat besar sebagai pelukis potret.

Selepas lebih 10 tahun meninggalkan dunia lukisan bagi memberi tumpuan kepada jualan popia di Jalan Putra, Alor Star, Kedah, Fakir kembali memperlihatkan bakatnya sejak dua bulan lalu dengan menyewa tapak di Kompleks Pekan Rabu.

"Saya melukis sejak di bangku sekolah dan pernah menjadi Johan Pertandingan Melukis Poster Zon Utara anjuran beberapa agensi kerajaan termasuk Lembaga Pemasaran Pertanian Persekutuan dan Majlis Perbandaran Kota Star," katanya.

Fakir ternyata puas dengan apa yang dilakukan apabila berpeluang melukis wajah pelanggannya pada setiap hari Sabtu dan Ahad di Kompleks Pekan Rabu dari jam 10 pagi hingga 7 malam.

Walaupun Fakir berkebolehan melukis pemandangan, poster dan mural, dia lebih puas menghasilkan lukisan potret.

Pada 1997, Fakir melukis potret secara percuma di Kompleks Perniagaan Star Parade dan pada 1998 menceburinya secara serius dengan menjelajah ekspo seluruh Kedah, Kuala Lumpur, Shah Alam, Pulau Pinang serta Perlis.

Fakir mampu menghasilkan lukisan potret lakaran pensil dalam masa 20 minit dengan upah RM10 manakala pastel warna antara RM70 hingga RM100.

Ketika ditemui, Fakir baru saja menyiapkan lukisan potret Perdana Menteri, Datuk Seri Dr Mahathir Mohamad.

"Walaupun pada petang hingga malam saya bersama ayah (Jamal Mohamad Kadir Maidin, 70) menjual popia, sebelah pagi saya akan menyiapkan lukisan potret," katanya.

Walaupun sibuk dengan rutin harian membantu ayahnya membuat kulit dan kuah popia di rumah mereka di Taman Tunku Yaakob, Fakir sebolehnya tidak ingin mempersiapkan bakatnya.